

Servisc ai media ladins

Ai 23 de auriel fòvel avisa n ann che l'Ufize stampa dla Provinzia de Bulsan ova mudernisà si plata internet tla rujeneda ladina

Media - La cumpèida de tanc che se à nuzà dla plata internet cun i comunicac, fotos, ntervistes audio y video desmostra gran nteres per l'servisc de nfurmazion tla rujeneda ladina.

Sot al'adres www.provincia.bz.it/ uspl pòssen udèi la comunicazion da pert dl Guvirn provinziel y di servijes dla Provinzia de Bulsan che vèn fata per ladin te forma de comunicac stampa cun fotos, video y ntervistes a usc. Te chësc ultimo ann da canche la plata internet dl Ufize stampa fova unida modernisada nce per ladin, iel unì cumpedà 33.969 vijitadèures. „L aumènt de passa 20% di vijitadèures do l prim ann desmostra che l servisc de nfurmazion tla rujeneda ladina vèn prijà dassenn“, à dit l assessèur ladin Florian Mussner, juntan che la zifres muessa sambèn unì ududes n relazion ala cumpèida dla jènt ladina. La plata internet ladina dl Ufize stampa à ntan i prim mënsc dl 2010 abù mo n majer aumènt de vijitadèures.

Danter jené y merz iel unì cumpedà 11.484 vijitadèures che fej ora l 66,1% deplù permez ai medemi mënsc dl ann dant.

La pert zentrela dla plata internet per ladin dl Ufize stampa ie i comunicac cun fotografies. Truep nteres iel nce unì mustrà per i video y ntervistes a usc per ladin. „Pudèi udèi y audi la nutizies tla rujeneda ladina ie na maniera de comunicazion che tèn l var cun i tèmpe,“ sotrissea l assessèur

provinziel ladin. Sun la plata internet possa uniun fé l abunamènt debant ala nutizies tres e-mail y ala zaita provinziela.

L servisc dl Ufize stampa tla rujeneda ladina ie trèi iedesc de utl: per la redazions, per duc i nteressei y per la rujeneda. I comunicac vèn mandei ora a duc i media de rujeneda ladina y tl medemo tèmpe possa duc i nteressei liejer do la nuviteies per ladin tl internet.

„Scri de cuestions aministratives per ladin ne n'ie nia for tan scèmpl y chësc servisc desmostra che n possa se nuzé de nosta rujeneda nce te chisc caji. Per l manteni dla rujeneda iel dessegur n cuntribut mpurtant,“ spiega l assessèur ladin Florian Mussner.

L Guvirn provinziel y l aministrazion publica dà inant la nfurmazions sun si atività tres l Ufize stampa y si lèur ie a chësta maniera nce trasparènt. La comunicazion ala stampa cuer nsci l duvier de nfurmé y ie tl medemo tèmpe nce n servisc per la populazion. (usc)



La plata internet ladina dl Ufize stampa dla Provinzia.